



**Republika e Kosovës**  
**Republika Kosovo - Republic of Kosovo**  
**Kuvendi - Skupština - Assembly**

---

**Legjislatura VI**

**Sesioni vjeshtor**

**Komisioni për Administratë Publike, Qeverisje Lokale dhe Media**

Mbledhja nr. 46

Prishtinë, më 19 dhjetor 2018, në orën: 10:00

Ndërtesa e Kuvendit, salla N-302

**Procesverbal**

Në mbledhje morën pjesë: Nait Hasani, Shqipe Pantina, Valon Ramadani, Adem Mikullovc, Arban Abrashi, Imet Rrahmani, Xhevahire Izmaku, Rasim Selmanaj, Milaim Zeka dhe Albert Kinolli.

Mungoi: Jasmina Zhivković.

Në mbledhje morën pjesë: Valdrin Lluka, ministër i MZHE-së, Agim Kukaj, Sami Boroci, KDI, Kosova Post, RTV21, Ekonomia online, OJQ- Handikos dhe Koha ditore.

Stafi mbështetës i Komisionit: Drita Morina dhe Mirjeta Heta.

Mbledhjen e kryesoi: Nait Hasani, kryetar i Komisionit.

**Rendi i ditës:**

- 1. Miratimi i rendit të ditës;**
- 2. Takim me Ministrin e Zhvillimit Ekonomik z. Valdrin Lluka, në lidhje me çështjen e digjitalizimit të transmetimeve radio difuzive tokësore;**
- 3. Të ndryshme.**

**1. Miratimi i rendit të ditës;**

Rendi i ditës u miratua pa ndryshime.

## **2. Takim me Ministrin e Zhvillimit Ekonomik z. Valdrin Lluka, në lidhje me çështjen e digjitalizimit të transmetimeve radio difuzive tokësore;**

**Nait Hasani**, njoftoi Ministrin e MZHE-së, se me kërkesën e komisionit është caktuar takimi për çështjen e digjitalizimit, për arsye se me Projektligjin për Buxhetin për vitin 2019, nuk është paraparë ndarja e mjeteve për procesin e digjitalizimit, edhe pse sipas ligjit në fuqi për digjitalizimin, procesi është dashur të përfundojë në vitin 2017. Meqë, digjitalizimi nuk ka filluar, ndërsa ligji në fuqi ka kohën e kufizuar të zbatimit, ai pyeti, a ka ndonjë projekt apo plan për zbatimin e ligjit dhe a mos duhet që ligji në fuqi të ndryshohet ose duhet gjetur ndonjë formë e re për zgjidhjen e problemit të digjitalizimit.

**Valdrin Lluka**, ministër i MZHE-së, tha, se realisht implementues i ligjit është KPM-ja. Me ligj janë përcaktuar kushtet e transmetuesve, të drejtat obligimet e operatorëve multipleks dhe ofruesve të shërbimeve mediale.

Sipas nenit 47, të Ligjit për KPM-në, përcaktohet që digjitalizimi të rregullohet me ligj të veçantë, ligj ky i cili bie në domenin e Ministrisë përkatëse –MZHE-së. Në hartimin e draftit të ligjit, në grupet punuese, kanë marrë pjesë të gjitha grupet e interesit ARKEP, KPM, RTK, KTTN, OSBE, IPKO, etj, por në procedurat e amendamentimit të Projektligjit, është hequr përgjegjësia e MZHE-së dhe kjo përgjegjësi me ligjin në fuqi, ka kaluar tek KPM-ja, e cila është përgjegjëse, sipas ligjit në fuqi, andaj edhe përgjegjësia për moszbatimin e ligjit është e KPM-së.

Vlen të theksohet se KPM-ja, ka formuar komisionin mbikëqyrës për tenderin, për digjitalizimin, në të cilin komision, KPM-ja ka pasur kryetarin dhe dy anëtarë, ARKEP-ja, dy anëtarë, ndërsa një anëtar ka qenë nga MZHE-ja.

Komisioni nuk doli me ndonjë rezultat për procesin, andaj e njëjta mbanë përgjegjësinë e plotë.

**Shqipe Pantina**, pyeti, meqë, Qeveria nuk e ka kryer obligimin e vet (miratimin e Strategjisë), a janë të njoftuar MZHE-ja, se ku ka stagnuar procesi i miratimit të strategjisë, a ka plan Qeveria për krijimin e infrastrukturës së re, apo do të përdoret infrastruktura ekzistuese, apo mos duhet që Kuvendi të ndryshojë ligjin?

**Xhevahire Izmaku**, tha se, është shqetësuese mosmiratimi i Strategjisë nga Qeveria, ndërsa kërkesa e saj ishte që tani të fillohet të punohet.

**Adem Mikullovc**, pyeti: me çfarë pajisje do të bëhet digjitalizimi, pasi që pajisjet ekzistuese janë tepër të vjetruara.

**Imet Rrahmani**, pyeti se sa është vlerësuar kostoja e digjitalizimit dhe a është ai vlerësimi real.

**Milaim Zeka**, tha, si është e mundur që në dispozitat e ligjit të përcaktohen kushtet dhe rregullat e tenderit, nëse Qeveria nuk e merr përgjegjësinë për procesin e digjitalizimit, digjitalizimi nuk do të bëhet asnjëherë.

**Nait Hasani**, pyeti: a ka ndarë Qeveria buxhet për digjitalizimin, apo kjo do t'ju lejohet operatorëve.

**Agim Kukaj**, përfaqësues i MZHE-së, duke u përgjigjur në pyetjet e shtruara, theksoi se MZHE-ja ka qenë e gatshme të marrë përgjegjësinë, por me ligj është përcaktuar që frekuencat jepen me tender dhe është e ndaluar që një frekuencë të jepet ndryshe. Por, ata që aplikojnë për frekuencë, janë të obliguar ta ndërtojnë rrjetin e transmetimit dhe mbi këtë bazë vlen të theksohet se një kanal analog vlen për 18 kanale digjitale.

Strategjia e KPM-së asnjëherë nuk i ka plotësuar kushtet sipas udhëzimit administrativ të Qeverisë. Ligji ka qenë i implementueshëm edhe pa strategjinë – nuk ka pasur nevojë të kemi strategji. Hendikepi ka qenë se KPM-ja ka kërkuar që në Komisionin mbikëqyrës për digjitalizimin të ketë edhe një anëtar, do të thotë, nga dy anëtarë, të ketë tre anëtarë dhe të mbajë kryesimin e komisionit, ndërsa MZHE-ja ka kërkuar që të udhëheq procesin dhe të kryesojë komisionin me vetëm një anëtar dhe komisionit ti shtohet edhe një anëtar nga ARKEP-ja, si rregullator nacional i brezit të frekuencave.

Ai gjithashtu, e njoftoi komisionin, se në cilësinë e zyrtarit kompetent të MZHE-së, ka pasur takime me Bankën Botërore rreth një analize se çka të bëhet tutje me procesin e digjitalizimit, për mënyrën e qasjes së problemit, në mënyrë që në bazë të një analize të tillë, të fillojë projekti në janar të vitit 2019.

Çështje shumë me rëndësi për procesin, është se kush do të ketë pronësinë dhe kush do ta mirëmbajë procesin.

**Konstatim:** me propozimin e të gjithë anëtarëve të komisionit, u vendos që për mbledhjen e radhës të ftohet përsëri ministri i MZHE-së, KPM-së dhe ministri i Financave.

Mbledhja përfundoi në orën: 12:15.

**E përgatiti:**

**Stafi mbështetës i Komisionit.**

**Kryetari i Komisionit,**

-----  
**Nait Hasani**